



Broj:01-1-3767/12
Sarajevo, 11.12.2012. godine

MEDIJIMA

Predmet : Saopćenje za javnost

Poslovanje bankarskog sistema u Federaciji BiH u trećem kvartalu 2012.godine

Pokazatelji do kojih je došla Agencija za bankarstvo Federacije BiH na osnovu dostavljenih izvještaja o poslovanju banaka u trećem kvartalu tekuće godine potvrđuju da je stabilnost i sigurnost ukupnog bankarskog sistema Federacije BiH zadovoljavajuća. To potvrđuje stopa adekvatnosti kapitala bankarskog sistema, kao jedan od najvažnijih pokazatelja snage i adekvatnosti kapitala banaka, koja je sa 30. 09. 2012. godine iznosila 17%, što je i dalje znatno više od zakonski propisanog minimuma od 12%.

U trećem kvartalu primjetan je i rast kapitala banaka u F BiH koji je iznosio 2,2 milijardi KM, što je za 6 % ili 128 miliona KM više nego na kraju 2011. godine i ostvaren je najviše po osnovu direktne dokapitalizacije i povećanja rezervi kod jedne banke.

Iako je u 2011. godini došlo do pozitivnih kretanja i poboljšanja određenih pokazatelja poslovanja bankarskog sektora, posebno u segmentu kreditiranja i profitabilnosti, te je nastavljen rast štednje stanovništva, pokazatelji u 2012. godini, kao što su pad bilansne sume, smanjenje novčanih sredstava i izvora finansiranja (depozita i kreditnih obaveza) i blagi rast kredita, pokazuju da je uticaj krize i dalje evidentan.

Bilansna suma bankarskog sektora sa 30. 09. 2012. godine iznosila je 14,9 milijardi KM, što je manje za 2% ili 347 miliona KM nego na kraju 2011. godine.

Također, struktura aktive u odnosu na kraj prošle godine, imala je manje promjene vezano za povećanje učešća kredita sa 68,7% na 71,3% i smanjenje novčanih sredstava sa 28,8% na 25,8%, što je rezultat kreditiranja iz već postojećih novčanih sredstava te nedostatak priliva novih izvora.

Tako su krediti na kraju trećeg kvartala dostigli nivo od 10,6 milijardi KM a novčana sredstava su zabilježila pad od 12% ili 531 milion KM i sa trećim kvartalom 2012. godine iznosila su 3,85 milijardi KM.

Iako su depoziti zabilježili pad od 2,9 % ili 326 miliona KM, sa iznosom od 10,8 milijardi KM i učešćem od 72,4% u strukturi pasive i dalje su dominantan izvor finansiranja banaka u Federaciji BiH. Kreditne obaveze, kao drugi najznačajniji izvor finansiranja banaka u Federaciji BiH, također su zabilježile pad od 9,5% ili 125 miliona KM i na kraju trećeg kvartala 2012. godine iznose 1,19 milijardi KM. U posljednje tri godine, zbog uticaja finansijske i ekonomske krize, banke su se znatno manje zaduživale u inostranstvu, a plaćanjem dospjelih obaveza, ovi izvori su značajno smanjeni (na kraju 2008. godine iznosili su 2,17 milijardi KM).

Pozitivan pokazatelj je porast štednih depozita u 2012. godini, koji su imali rast od 4 % ili 215 miliona KM i sa 30. 09. 2012. godine iznosili su 5,58 milijardi KM.

Na nivou bankarskog sistema u F BiH za devet mjeseci 2012. godine ostvaren je pozitivan finansijski rezultat u iznosu od 111 miliona KM što je rezultat značajnog povećanja dobiti kod banaka koje su pozitivno poslovale i u istom periodu prošle godine, te smanjenje gubitka kod banaka koje su negativno poslovale.

Dakle, iz podataka je vidljivo da je i u proteklom periodu bankarski sektor Federacije BiH iznalazio mogućnosti odupiranja nepovoljnim okolnostima koje je donijela globalna ekonomska i finansijska kriza.

URED FBA ZA INFORMIRANJE